

四庫全書

史部

欽定四庫全書

史部

通志卷一百五十四

詳校官編修<sub>臣</sub>李潢

編修<sub>臣</sub>裴謙覆勘

覆校官助教<sub>臣</sub>金學詩

校對官待詔<sub>臣</sub>胡士震

謄錄監生<sub>臣</sub>陳振興

欽定四庫全書

通志卷一百五十四

宋右迪功郎鄭

樵漁仲撰

列傳第六十七

北齊

孫纂 陳元康 杜弼

房謨

廉景孫

張纂 張亮

趙起徐遠

張曜 王峻 王紘

敬顯雋

子長瑜

平鑒

唐邕 白建

元文遠

子行恭

趙彥深

子仲將

祖珽

從弟

孝隱 孝隱  
從父弟茂

赫連子悅

馮子琮

辛術

裴讓

之弟諷之  
謁之

諷之  
皇甫和

謀之  
和弟亮

訥之

崔劼

崔肇師

盧潛

盧詢祖

崔子樞

弟子端

叔父叔瓚

子

孫搢字彥舉樂安人世寒賤少勵志勤學自檢校御史

再遷國子助教太保崔光引修國史歷行臺郎以文著

稱後預崔祖螭反逃於王元景家遇赦乃出孫騰以宗

情薦之神武未被知也會神武西討登鳳陵命中外府

司馬李義深相府城局李仕畧共作檄文二人皆請以

舉自代神武引舉入帳自為吹火催促之舉神色安然  
援筆立成其文甚美神武大悅即以爲相府主簿專典  
文筆又能通鮮卑語兼傳宣號令當繁劇之任大見賞  
重賜妻韋氏既士人子女又甚色貌時人榮之文襄初  
欲之鄴總知朝政神武以其年少未許舉爲致言乃果  
行恃此自乞特進文襄但加散騎常侍特大括民以爲  
軍士逃隱者身及主人三長守令罪以大辟沒入其家  
於是所獲甚衆舉之計也舉學淺行薄邢邵嘗謂之曰

更須讀書。寨曰：我精騎三千足敵君。羸卒數萬，寨少時與溫子昇齊名，嘗謂子昇：「卿文何如我？」子昇謙曰：「不如。」卿寨要其為誓。子昇笑曰：「但知劣於卿，便是何勞？」旦寨悵然曰：「卿不為誓，事可知矣。」寨嘗服棘刺九李諧調之曰：「卿棘刺應自足，何假外求？」坐者皆笑。司馬子如與高季式召寨飲酒，醉甚而卒。神武親臨之，子如叩頭請罪。神武曰：「折我右臂，贈吏部尚書、青州刺史。」

陳元康，字長猷，廣宗人也。父終德，魏濟陰內史。元康貴。

贈度支尚書諡曰貞元康頗涉文史機敏有幹用魏正  
光中從李崇北伐以軍功賜爵臨清男普泰中除主書  
累遷司徒高昂記室初司馬子如高季式與孫搴劇飲  
搴醉死神武命求好替子如舉魏收他日神武謂季式  
曰卿飲殺我主簿魏收作文書都不稱意司徒嘗道一  
人謹密是誰季式以元康對曰是能夜闇書快吏也召  
之一見便授以大丞相功曹參軍內掌機密善陳事意  
不為華藻遷大行臺都官郎封安平子軍國多務元康

問無不知神武臨行留元康在後馬上有所號令九十餘條元康屈指數之盡能記憶神武甚親之曰如此人世間希有我今得之乃上天降佐也時趙彥深亦知機密人謂之陳趙而元康執居趙前性又柔謹神武之伐劉蠡升天寒雪深使人舉氈元康於氈下作軍書颯颯運筆筆不及凍俄頃數紙及出神武目之曰此何如孔子邪神武嘗怒文襄於內親加歐蹋極口肆詈出告元康元康俯伏泣下霑地諫曰王教訓世子自有禮法儀



刑式瞻豈宜至是神武曰我性急嗔阿惠常如此元康  
大啼曰一度為甚况常然邪神武從此為慙忿時或恚  
撻輒曰勿使元康知又謂左右曰元康用心誠實必與  
我兒相抱死高仲密之叛神武知其由崔暹故也將殺  
暹文襄匿暹而為之請神武曰我為爾存其性命然須  
與苦手文襄乃出暹而謂元康曰卿若使崔暹得杖無  
相見也暹入庭解衣將受罰元康趨入止伍伯因歷階  
而升曰王方以天下付世子世子有崔暹不能免其杖

父子尚爾況世間人邪神武意解曰不由元康崔暹得  
一百乃捨之文襄入輔政崔暹崔季舒崔昂等並被任  
使張亮張徽纂並爲神武待遇然委任皆出元康之下  
神武每與元康久語文襄門外待接之時人語曰三崔  
二張不如一康左衛將軍郭瓊以罪死子婦范陽盧道  
虔女也沒官神武啟以賜元康爲妻元康地寒時以爲  
殊賞元康遂棄故妻李氏識者非之元康便辟善事人  
希顏候意多有進舉而不能正心處物溺於財利受納

金帛不可勝紀責負交易徧於州郡爲清論所譏從神武於芒山將戰遺失陣圖元康冒險求得之西師既敗神武大會諸將議進取之策咸以爲野無青草人馬疲瘦不可遠追元康曰兩雄交爭歲月已久今得大捷便是天授時不可失必須乘勝追之捨之必成後患神武曰若遇伏兵孤何以濟元康曰前沙苑還軍彼尚無伏今者奔敗何能遠謀神武不從以爲行臺郎及神武疾篤謂文襄曰邙山之戰不用元康之言方貽汝患以此

爲恨死不瞑目我死事皆當與元康定也神武崩祕不  
發喪唯元康知之文襄嗣事自晉陽之鄴令元康預作  
神武條教數十紙留付段孝先趙彥深在後以次行之  
別封昌國縣公以從嘉名又見任待拜散騎常侍侯景  
反文襄逼於諸將欲殺崔暹以謝之密語元康元康諫  
曰今雖四海未清綱維已定若以數將在外苟悅其心  
枉殺無辜虧廢典刑豈直上負天神何以下安黎庶晁  
錯前事願公慎之文襄乃止高岳討侯景未剋文襄欲

遣潘相樂副之元康曰相樂緩於機變不如慕容紹宗  
且先王有命稱堪敵侯景公但推赤心於此人則侯景  
不足憂也是時紹宗在遠文襄欲召之恐其驚叛元康  
曰紹宗知元康特蒙顧待新使人來餉金以致誠款元  
康欲安其心故受之而厚答其書保無異也文襄乃任  
紹宗遂以破景賞元康金五十斤王思政入潁城諸將  
攻之不能拔元康進計於文襄曰公自匡輔朝政未有  
殊功雖敗侯景本非外賊今潁城將陷顧公因而乘之

足以取威定業文襄於是令元康馳驛觀之復命曰必可拔文襄乃親征潁川益發衆軍往既至而剋之賞元康金百鉞初魏朝授文襄相國齊王文襄頻辭不受乃召諸將及元康等密議之諸將皆勸文襄恭膺朝命元康謂魏收曰時未可耳觀諸人語專欲誤王王不宜受崔暹因間之薦陸元規爲大行臺郎欲分元康權元康既貪貨賄文襄內漸嫌之又欲用爲中書令以閑地處之事未施行屬文襄將受魏禪元康與楊愔季舒並在

坐將大遷除朝士共品藻之文襄家倉頭蘭固成掌厨  
饌爲文襄所撻固成吳人性躁遂忿恚與其同事阿改  
謀害文襄阿改時事文宣常執刀隨從期聞東齋噉聲  
即加刃於文宣是日文宣別有所之未還而難作固成  
因進食置刀於盤下而殺文襄元康抱文襄文襄曰可  
惜可惜與賊爭刀髻解被刺傷重腸出猶手書辭母口  
占授祖孝徵陳權宜至夜而終時年四十三時楊惛狼  
狽走出遺一靴崔李舒逃匿於廁庫直紇奚舍樂捍賊

死散都督王師羅戰傷監厨倉頭薛豐洛率宰人持薪  
以赴難乃禽盜固成一名京事見文襄本紀是時祕文  
襄凶問故殯元康於宮中托以出使南境虛除中書令  
明年詔贈司空諡文穆元康卒後母李氏哀感發病而  
終贈廣宗郡君諡曰貞昭元康子善藏嗣善藏溫雅有  
鑒裁位給事黃門侍郎開皇中尚書郎大業初卒於彭  
城郡贊務

杜弼字輔元中山曲陽人也祖彥衡淮南太守父慈度



繁時令弼幼聰敏家貧無書年十三寄郡學受業同郡甄琛為定州刺史簡試諸生見而策問義解開明應答如響大為琛所歎服命其二子指寬與弼為友州牧任城王澄聞而召問琛相嗟賞許以王佐之才澄琛還洛稱之於丞相高陽王等多相招命但父祖官薄不獲優叙以軍功起家除征虜府墨曹參軍典管記弼長於筆札母為時輩所推孝昌初除太學博士遷光州曲城令為政清靜遠近稱之弼父在鄉為賊所害弼居喪六年

以常調除侍御史領內正字臺中彈奏皆弼所爲諸御  
史出使所上文簿委弼覆臺然後施行儀同竇泰西伐  
詔弼監軍及泰失利自殺弼與其徒六人走還陝州刺  
史劉貴鑠送晉陽神武詰之曰竇中尉此行違吾法以  
自取敗亡爾何由不一言諫諍弼對曰刀筆小生唯有  
文墨薄伎便宜之事議所不及神武怒左遷下灌鎮司  
馬後累遷大行臺郎中神武又引弼典掌機密甚見信  
待或有造次不及書教直付虛紙即令宣讀弼嘗承間

密勸受魏禪神武舉杖擊走之相府法曹辛子炎詣事  
云取署子炎讀署為樹神武怒其犯偏諱杖之於前弼  
進曰禮二名不偏諱孔子言微不言在子炎之罪理或  
可恕神武罵之曰眼着人瞋乃牽經引禮叱令出去弼  
行十許步呼還子炎亦蒙釋文襄聞之語楊愔曰王左  
右賴有此人天下蒙其利豈獨吾家也初神武自晉陽  
東出改爾朱氏貪政使人入村不敢飲社酒及平京洛  
貨賄漸行弼以文武在位罕有廉潔言之神武神武曰

弼來我語爾天下濁亂習俗已久今督將家屬多在關西黑獺常相招誘人情去留未定江東復有一吳兒老翁蕭衍者專事衣冠禮樂中原士大夫望之以為正朔所在我若急作法網不相饒借恐督將盡投黑獺士子悉奔蕭衍則人物流散何以為國爾宜少待吾不忘之及將有沙苑之役弼又請先除內賊却討外寇神武曰內賊為誰弼曰諸勲貴掠奪萬民者皆是也神武不答因令軍人皆張弓挾矢舉刀按稍以夾道使弼冒出其

間曰必無傷也弼戰慄流汗神武然後喻之曰箭雖注  
不射刀雖舉不擊稍雖按不刺爾猶頓喪魂膽諸勲人  
身觸鋒刃百死一生縱其貪鄙所取處大弼頓顙謝曰  
愚人不識至理後從神武破西魏於邛山命為露布弼  
手即書絹曾不起草以功賜爵定陽男加通直散騎常  
侍奉使詣闕魏帝見之於九龍殿曰閑卿精學聊有所  
問因問經中佛性法性之異弼對以正是一理又問曰  
說者皆妄言法性寬佛性隘如何弼曰在寬成寬在隘

成匱若論性體非匱非寬詔曰既言成寬成匱何得非匱非寬弼曰若定是寬則不能爲匱若定是匱亦不能爲寬以非寬非匱所成雖異能成恒一上稱善引入經庫賜地持經一部賜帛百匹弼性好名理探味元宗自在軍旅恒帶經從行注老子道德經二卷表上之遷廷尉卿會梁遣貞陽侯蕭淵明等入寇彭城大都督清河王高岳行臺慕容紹宗討之詔弼爲軍司攝行臺左丞臨發文襄賜胡馬一匹語曰此廐中第二馬孤常自乘

騎今方遠別聊以爲贈又令陳政務之要可爲鑒戒者錄一兩條弼請口陳曰天下大務莫過賞罰二端賞一人使天下之人喜罰一人使天下之人服二事得治自然盡美文襄大悅曰言雖不多於理甚當握手而別破蕭淵明於寒山又破侯景於渦陽後六年四月八日魏帝集名僧於顯陽殿講說佛經勅弼升師子坐當衆敷演辯難鋒至莫有能屈帝歎曰此賢若生孔門則如何也關中遣王思政據潁川朝廷以弼行潁州攝行臺左

丞及潁州平文襄曰卿試論王思政所以禽弼曰思政不察逆順之理不識大小之形不度強弱之執有此三蔽宜其俘獲文襄曰古有逆取順守大吳困於小越弱燕能破彊齊卿之三義何以自立弼曰王若順而不大大而不彊彊而不順於義或偏得如聖旨今既兼備鄙言可以還立文宣作相引爲兼長史進爵爲侯弼志在匡贊知無不爲及齊受禪以預定策功遷驃騎將軍衛尉卿別封長安縣伯常與邢邵扈從東山共論名理邢



以爲人死還生恐是爲蛇畫足弼曰物之未生本所無也無而能有不以爲疑因前生後何獨致怪邢云聖人設教本由勸獎故懼以有來望各遂其性弼曰聖人合德天地齊信四時言則爲經行則爲法而云以虛示物以詭勸人安得使北辰降光龍宮韞櫝既如所論福果可以鎔鑄性靈弘獎風教爲益之大莫極於斯此即真教何謂非實邢云季札言無不之亦言散盡若復聚而爲物不得言無不之也弼曰骨肉下歸於土魂氣則無

不之此乃形墜魂游往而非盡由其尚有故云無所不之若也全無之將焉適邢云神之在人猶光之在燭燭盡則光窮人死則神滅弼曰燭則因質生光質大光亦大人則神不係於形形小神不小故仲尼之智必不短於長狄孟德之雄乃遠奇於崔琰其後別與邢書前後往復再三邢理屈而止文多不載又以本官行鄭州事未發家客告弼謀反按問無實久乃見原因絕朝請坐次子廷尉監臺卿斷獄稽遲與寺官俱爲郎中封靜哲

所訟徙臨海鎮時楚州人東方白額謀反鎮爲賊帥張  
綽潘天合等所攻弼率厲城人終得全固文宣嘉之勅  
行海州事後除膠州刺史弼所在清靜廉潔爲吏民所  
懷耽好元理注莊子惠施篇并易上下繫名曰新注義  
苑並行於世性質直在霸朝多所匡正及文宣作相致  
位寮首初聞揖遜之議猶有諫言文宣又嘗問弼治國  
當用何人對曰鮮卑車馬客會須用中國人文宣曰此  
言譏我高德正居要位弼不能下之乃至於衆前面折

德正德正深以爲恨數言其短又令主書杜永珍密啟  
弼在長史日受人請屬大營婚嫁帝內銜之弼恃舊仍  
有公事陳請十年夏上因飲酒積其慤失遣使就州斬  
之尋悔驛追不及子蕤遠徙臨海鎮次子臺卿先徙東  
豫州乾明初並得還鄴天統五年追贈弼開府儀同三  
司尚書右僕射武平元年又贈驃騎大將軍諡曰文肅  
蕤字子美學業不如弟臺卿而幹局過之武平中位大  
理少卿兼散騎常侍聘陳使主吏部郎中隋開皇中終

於開州刺史子公贍仕隋位安陽令公贍子之松大業中起居舍人臺卿列在隋史

房謨字敬放河南洛陽人也其先代人本姓屋引氏少淳厚雖無造次能而沈深內敏魏正光末歷位昌平代郡太守所在著廉惠及六鎮亂謨率郡人入九嶺山結壘拒守時外無救援乃率所部奔中山遇鮮于修禮之亂朝廷以謨得北邊人情以為假燕州事北轉至幽州南為修禮所執仍陷葛榮榮敗爾朱榮啟授行冀州事

尋除太寧太守榮死其黨徵兵謨不應前後斬其三使  
遣弟毓詣闕孝莊以毓爲都督毓弟欽爲行臺並持節  
詣謨同爲經畧及京都淪覆爲賊黨建州刺史是蘭安  
定執繫州獄蜀人聞謨被囚並叛安定於是給謨弱馬  
令軍前慰勞諸賊見謨莫不遙拜謨先所乘馬安定別  
給將士戰敗蜀人得之謂謨遇害莫不悲泣善養其馬  
不聽乘騎兒童婦女競投草粟皆言此房公馬也其結  
愛人心如此爾朱世隆聞而嘉之捨其罪以爲東北道

行臺及爾朱氏敗濟州刺史侯景以謨先款附推謨降  
首謨以受眷爾朱不宜先爲反覆不從其計神武入洛  
再遷潁川太守魏孝武帝入關神武以謨忠貞遣其弟  
毓爲大使持節勞問時軍國未寧徵發煩速至有數使  
同徵一物公私勞擾謨請事遣一使下自催勒朝廷從  
之徵爲丞相右長史以清直甚被賞遇謨悉心盡力知  
無不爲前後賜其奴婢多見放免神武後賜其生口多  
黥面爲房字而付之神武討關右以謨兼大行臺左丞

長史如故總知府省務天平三年行定州事請在左右  
拾遺補闕固不肯行神武責而罷之未幾出為兗州刺  
史謨選用廉清廣布恩信僚屬守令有犯必知雖號細  
密百姓安之轉徐州刺史始謨在兗州彭城慕其政化  
及為刺史合境欣悅謨為政如在瑕丘先是當州兵皆  
僚佐驅使饑寒死病動至千數謨至皆加檢勒不令煩  
擾以休假番代洗沐督察主司親自檢視又使傭賃令  
作衣服終歲還家無不溫飽全濟甚多時梁魏和好使



人入其界者咸稱歎之神武與諸州刺史書叙謨及廣  
平太守羊敦廣宗太守竇瑗平原太守許季良清能以  
爲勸勵謨曾啟神武以天下未寧宜降婚勲將收將士  
心深見納用魏朝以河南數州鄉俗絹濫退絹一疋徵  
錢三百人庶苦之謨乃表請錢絹兩受任人所樂朝廷  
從之徵拜侍中監國史謨無他才學每求退身不許尋  
兼吏部尚書加衛大將軍以子子遠罪解官久之詔復  
本將軍起爲大丞相左長史後除晉州刺史加驃騎大

將軍又攝南汾州事先時境接西魏土人多受其官爲之防守至是酋長鎮將及都督守令前後降附者三百餘人謨撫接殷勤人樂爲用爰及深險胡夷咸來歸服謨常以已祿物充其饗賚文襄嘉之聽用公物西魏懼乃增置城戍慕義者自相糾合擊破之自是龍門已北西魏戍皆平文襄特賜粟千石絹二百疋班示天下卒於州州府相帥贈物及車牛妻子遵其遺志拒而不納謨寡嗜慾貞白自守然內營家產足爲富贍不假官俸

是以世稱清白贈司空諡曰文惠謨與子結婚盧氏謨卒後盧氏將改適他姓有平陽廉景孫者少厲志節以明經舉郡孝廉為謨所重至是訟之臺府不為理乃持繩詣神廟前北面大呼曰房謨清吏忠事高祖及其死也妻子見陵神而有知當助申之今引決訴於地下使以繩自經於樹衛士見之救解送所司朝廷哀其至誠命女歸房族謨前妻子子遠險薄謨甚嫌之不以為子例時以謨為後妻盧氏所譖神武亦以責謨謨陳其惡

神武弗信自收賙之令與諸子同學久乃令還後與任  
胄等謀殺神武事發神武歎曰知子莫若父信哉因上  
言房謨鄭述祖李道璠等三家理宜從法竊以謨立身  
清白履行忠謹鄭仲禮嚴祖庶兒晚始收拾李世林生  
自外養屬絕本宗二人特乞罪止一房魏帝許焉及謨  
卒子廣嗣廣弟恭懿仕隋歷州縣有能名列在良吏傳  
張纂字徽纂代郡平城人也初事爾朱榮又爲爾朱兆  
長史使於神武遂被顧識及相州城拔參丞相軍事封

武安縣伯累遷神武行臺右丞從征玉壁大軍將還山東至晉州忽遇寒雨士卒饑凍有死者州以邊禁不聽入城時纂為別使遇見輒令開門內之分寄人家給其火食多所全濟神武聞而善之纂性便辟事神武二十餘歲通傳教令甚見親賞文宣時卒於護軍將軍

張亮字伯德西河隰城人也初事爾朱兆神武討兆兆奔於秀容左右皆密通誠款唯亮獨無啟疏及兆敗竄於窮山令亮及倉頭陳山提斬其首以降皆不忍兆乃

自縊於樹亮伏屍而哭神武嘉歎之授丞相參軍漸見  
親待委以書記之任天平中為文襄行臺郎中與七兵  
事雖為臺郎而常在神武左右遷行臺右丞高仲密之  
叛與大司馬斛律金守河陽周文時於上流放火船欲  
燒河橋亮乃備小艇百餘皆載長鎖鎖施釘火船將至  
即馳小艇以釘釘之引鎖向岸火船不得及橋橋之獲  
全亮之計也武定初拜太中大夫薛琰嘗夢亮於山上  
挂絲以告亮且占之曰山上絲幽字也君其為幽州乎

數月亮出爲幽州刺史累遷尚書右僕射西南道行臺  
亮性質直勤力幹濟深爲神武文襄信委然少風格好  
財利久在左右不能廉潔及歷數州咸有黷貨之號天  
保初別封安定縣男位中領軍卒贈司空時霸府又有  
趙起徐遠者並見任委起廣平人性沈謹神武頻以爲  
相府騎兵二局典兵馬十餘載至文宣即位累遷大鴻  
臚卿雖歷九卿侍中常以本官監兵馬出內居腹心寄  
與二張相亞武平中卒於帥贈都督滄州刺史遠廣寧

人為丞相騎兵參軍深為神武所知累遷東楚州刺史  
政有恩惠郭邑大火城人亡產業遠躬自赴救對之流  
涕仍為經營皆得安立卒於衛尉卿

張曜字靈光上谷昌平人也少貞謹韓軌為刺史劾州  
府僚佐及軌左右以贓掛網者百餘人唯曜以清白免  
天保初賜爵都鄉男累遷尚書右丞文宣曾因近出令  
曜居守帝夜還曜不特開門勒兵嚴備帝駐蹕門外久  
之催促甚急曜以夜深真偽難辨湏火至識面門乃可



開於是獨出見帝帝笑曰卿欲學邳君章邪乃使曜前  
開門然後入深嗟賞之賜以錦綵太寧初遷祕書監曜  
歷仕累朝奉職恪勤咸見親待未嘗有過每得祿賜輒  
散宗族性節儉率素車服飲食取給而已好讀左氏春  
秋月一徧時人比之賈梁道趙彥深嘗謂之曰君研深  
左氏豈求服虔杜預之紕繆乎曜曰何為其然乎左氏  
之書備叙前事惡者可以自戒善者可以庶幾故勵已  
溫習非欲詆訶古人得失也天統初奏事遇暴疾仆於

御前帝下坐臨視呼數聲不應帝泣曰失我良臣也旬日卒贈右僕射諡曰貞簡

王峻字巒嵩靈邱人也明悟有幹畧歷事神武文襄為相府佐賜爵北平男除營州刺史營州地接邊賊數為人患峻至州遠設斥堠廣置疑兵賊不敢發合境獲安先是刺史陸士茂詐殺室韋八百餘人因此朝貢遂絕至是峻要其行路大破之虜其酋帥厚加恩禮放遣之室韋遂獻誠款朝貢不絕峻有力焉蠕蠕主菴羅辰東

徙峻設伏大破之於此遁走歷位尚書河清中歷位南  
道行臺坐違格私度禁物并盜截軍糧有司定處斬刑  
家口配沒詔決鞭一百除名配甲坊蠲其家口武平中  
卒於侍中贈司空

王紘字師羅太安狄郡人也父基頗讀書有智畧初從  
葛榮與周文甚相知及周文據關中神武遣基與長史  
侯景同往焉周文留基不遣後乃逃歸歷南益北豫二  
州刺史所歷皆好聚歛然性和直吏人不甚怨苦後為

奴所害贈吏部尚書絃善騎射愛文學性敏捷年十三見揚州刺史太原郭元貞撫其背曰讀何書曰誦孝經曰孝經云何曰在上不驕為下不亂元貞曰吾豈驕乎絃曰君子防未然亦願留意元貞稱善十五隨父在北豫州行臺侯景與人論掩衣法為當左右尚書敬顯儁曰孔子云微管仲吾其被髮左衽矣以此言之右衽應是絃進曰國家龍飛朔野雄步中原五帝異儀三王殊制掩衣左右何足是非景奇其早慧賜以名馬興和中

文襄召為庫直奉朝請文襄遇禍絃冒刃捍禦以忠節  
進爵平春縣男頗為文宣所知為領左右都督文宣嘗  
與左右飲酒曰快哉大樂絃曰亦有大苦帝曰何苦絃  
曰長夜荒飲不悟國破是謂大苦帝默然後責絃曰爾  
與紇奚舍樂同事我兄舍樂死爾何不死絃曰君亡臣  
死自是常節但賊堅力薄故臣不死帝使燕子獻反縛  
之長廣王捉頭帝手刃將下絃呼曰楊遵彥崔季舒逃  
難官至僕射尚書冒死効命之士翻見屠戮曠古未有

此事帝投刃於地曰王師羅不得殺遂捨之後拜驃騎  
大將軍武平初加開府儀同三司上言突厥與周男女  
來往必相影響南北寇邊宜為之備五年陳人寇淮南  
封輔相議討之紘曰若復出頓江淮恐北狄西寇乘弊  
而來莫若薄賦省徭息人養士使朝廷協睦遐邇歸心  
征之以仁義鼓之以道德天下皆當肅清豈直江南偽  
陳而已高阿那肱謂衆曰從王武衛者南席衆皆同焉  
尋兼侍中聘周使還即正未幾卒紘好著述作鑒誡二

十四篇

敬顯雋字孝英陽平太平人也少英俠從神武信都義  
舉歷位度支尚書神武攻鄴顯雋督造土山以功封永  
安縣侯出內多歷顯官所在著名河清中卒於兗州刺  
史子長瑜武成時為廣陵太守多所受納刺史陸駿將  
表劾之以貨事和士開士開以書屏風詐為長瑜獻武  
成大悅駿表尋至遂不問遷合州刺史陷於陣卒子德  
亮齊亡後負屍歸德亮隋開皇初卒於尚書郎

平鑒字明遠燕郡薊人也祖珽魏安平太守父勝安州刺史鑒少聰敏受學於華陰徐遵明受詩禮於弘農楊文懿通大義不為章句雅有豪俠氣孝昌末見天下將亂乃之洛陽與慕容儼以客騎馬為業兼習弓矢鑒性巧夜制胡畫以供衣食俄奔爾朱榮榮大奇之以軍功累遷襄州刺史神武起義信都鑒棄郡來歸神武謂曰日者皇綱中弛公早已竭誠今爾朱披猖遂能捨逆從善搖落之時方識松筠之節啟授本官文襄輔政封西



平縣伯遷西懷州刺史鑒奏請於州西故軹關道築城以防遏西寇朝廷從之尋西魏將楊檟來攻時新築之城糧仗未集城舊乏水衆情大懼南門內有大井隨汲即竭鑿乃具衣冠俯井而祝至旦而井泉湧溢有異於常合城取足揚示敵人將士既覩非常勇氣自立楊檟敗以功進開府儀同三司累遷楊州刺史其妻生男鑒因喜酣醉擅免境內囚誤免關中細作二人醒而知之上表自劾文宣特原其罪賜犢百頭羊二百口酒百石

令作樂河清二年重拜懷州刺史時和士開使求鑒愛  
妾阿劉即送之仍謂人曰老公失阿劉與死何異要自  
為身計不得不然後卒於郡官尚書贈司空諡曰文子  
子敬嗣子敬輕險無行姦穢所至禽獸不若隋開皇中  
為晉州行參軍為并州總管秦王所殺

唐邕字道和太原晉陽人也其先自晉昌徙為父靈芝  
魏壽陽令邕貴贈司空公邕少明敏有才幹初直神武  
外兵曹以幹濟見知擢為文襄大將軍督護文襄崩事

出倉卒文宣部分將校鎮壓四方夜中召邕支配造次  
便了帝甚重之天保初稍遷給事中兼中書舍人封廣  
漢男及從征奚虜黃門侍郎袁猛舊典騎兵事至是為  
割配遲留鞭杖一百仍令邕監騎兵事以猛賜邕文宣  
頻年出塞邕必陪從專掌兵機識悟開明承受敏速自  
督將以還軍吏以上勞効由緒無不諳練每有顧問占  
對如響或於御前簡閱雖三五百人邕多不執文簿暗  
唱官位姓名未嘗繆誤七年於羊汾隄講武令邕總為

諸軍節度事畢仍監宴射之禮帝親執其手引至太后  
前坐於丞相斛律金之上啟太后云唐邕彊幹一人當  
千仍別賜錦綵錢帛邕非唯彊濟明辨然亦善揣上意  
取進多塗是以恩寵日隆委任彌重帝又嘗對邕白太  
后云唐邕分明彊幹每以軍機大事手作文書口具處  
分耳又聽受實是異人一日之中六度賜物又嘗解所  
服青鼠皮裘賜邕云朕意欲與卿共敝十年從幸晉陽  
除兼給事黃門侍郎領中書舍人文宣嘗幸并州登童

子佛寺望并州城曰此是何等城或曰此是金城湯池  
天府之國帝云我謂唐邕是金城此非也其見重如此  
後語邕云高德正妄說卿短而薦主簿郭敬朕已殺之  
卿劬勞既久欲除卿作州頻勅楊遵彥更除一人堪代  
卿者遵彥云徧訪文武如卿之徒實不可得所以遂停  
此意卿宜勉之帝或時切責大臣有不稱旨者云觀卿  
舉措不中與唐邕作奴其見賞遇多此類孝昭作相署  
相府司馬皇建元年除給事黃門侍郎於華林園射特

賜邕金帶寶器服玩五百種太寧元年除大司農卿河清元年突厥入寇遣邕驛赴晉陽募集兵馬在路聞虜將逼邕斟酌事宜改勅更促期會由此兵士限前畢集後拜侍中并州大中正護軍將軍從武成幸晉陽帝至武軍驛因醉責虞候都督范洪將殺之邕諫以為若非酒行戮雖族誅人無所怨假實有大罪因酒殺之恐招橫議洪因得免死邕又以軍人教習田獵依令十一月月別三圍以為人馬疲弊奉請每月兩圍又奏河陽晉

州與周連境請於河陽懷州永橋義寧烏籍各徙六州  
軍人并家立軍府安置以備機急之用武成並從之未  
幾出爲趙州刺史侍中護軍大中正悉如故帝謂邕曰  
朝臣未有帶侍中護軍中正作州者以卿舊勲故有此  
舉放卿百餘日休息至秋間當即追卿還邕政頗嚴酷  
然抑挫豪彊公事甚謹尋除中書監仍侍中遷尚書右  
僕射武平初坐斷事阿曲爲御史所劾除名久之以舊  
恩復除將軍開府累遷尚書令封晉昌王高思好構逆

令邕赴晉陽監勒諸軍事平錄尚書事屬周師來攻洛陽右丞相高阿那肱率兵赴援邕配割不甚從允因此有隙那肱譖之由是被疎七年車駕將幸晉陽勅斛律孝卿總知騎兵事多自決不相詢稟邕自恃從霸朝以來常典樞要歷事六帝恩遇甚重一旦為孝卿所輕負氣鬱快形於辭色帝從平陽敗後狼狽還鄴邕懼那肱譖愬恨孝卿輕已遂留晉陽不從與莫多婁敬顯等立安德王延宗為帝信宿城陷邕遂降周依例授上開府



儀同大將軍再遷戶部轉少司馬封安福郡公遷鳳州  
刺史隋開皇初卒贈鳳州刺史邕性識明敏通解時事  
齊氏一代典執兵機凡是九州軍士四方勇募彊弱多  
少番代往還及器械精麤糧儲虛實精心勤事莫不諳  
知自太寧以來奢侈靡費比及武平之末府藏漸虛邕  
度支取舍大有裨益然既被任遇意氣漸高其未經府  
寺陳訴起覽辭牒條數甚多俱為憲臺及左丞彈劾並  
御注放免司空從事中郎封長業太尉記室參軍平濤

並爲徵官錢違限邕各杖背二十齊時宰相未有撾撻  
朝士者至是大駭物望三子長子君明開府儀同三司  
開皇初卒於應州刺史次子君徹中書舍人隋戎順二  
州刺史大業中卒於虎賁郎將少子君德以邕降周伏  
法齊朝因神武作相丞相府外兵曹騎兵曹分掌兵馬  
及天保受禪諸司咸歸尚書唯此二曹不廢令唐邕白  
建主之謂之外兵省騎兵省其後邕建位望轉隆各置  
省令中書舍人分判二省事故世稱唐白云

白建字彥舉太原安邑人初入大丞相府任騎兵曹典  
文帳明解書計為同局所推天保末兼中書舍人孝昭  
輔政除大丞相騎兵參軍河清二年除員外散騎常侍  
仍舍人三年突厥入境代忻二牧悉是細馬合數萬匹  
在五臺山北栢谷中避賊賊退勅建送馬定州付人養  
飼建以馬瘦違勅以便宜從事戎馬無損建有力烏武  
平末歷位尚書特進侍中中書令封高昌郡公父長命  
贈開府儀同三司都官尚書建雖無他材伎勤於在公

以溫柔自處與唐邕俱以典執兵馬致位卿相諸子幼弱俱為州郡主簿男女婚嫁皆得勝流卒贈司空

元文遙字德遠河南洛陽人魏昭成皇帝六世孫也五世祖常山王遵父晞有孝行父卒廬於墓側而終文遙貴贈特進開府儀同三司中書監諡曰孝文遙敏慧夙成濟陰王暉業每云此子王佐才也暉業嘗大會賓客時有人將何遜集初入洛諸賢皆贊賞王召河間邢邵命文遙誦之幾徧可得文遙一覽便誦時年始十餘歲

濟陰王曰我家千里駒今定何如邢云此殆古來未有  
起家員外散騎侍郎遭父喪服闋除太尉東閣祭酒以  
天下方亂遂解官侍養隱於林慮山武定中文襄召爲  
大將軍府功曹齊受禪於登壇所授中書舍人宣傳文  
武號令楊遵彥每云堪解穰侯印者必在斯人後忽中  
旨幽繫竟不知所由如此積年文宣後自行禁獄執手  
愧謝親解所著金帶及御服賜之即日起爲尚書祠部  
郎中孝昭攝政遷大丞相府功曹參典機密及踐阼除

中書侍郎封永樂縣伯參軍國大事及帝大漸與平秦王歸彥趙郡王叡等同受顧託迎立武成武成即位任遇轉隆歷給事黃門侍郎散騎常侍侍中中書監天統二年詔特賜姓高氏屬籍宗正子弟依例歲時入廟朝祀再遷尚書左僕射進封寧都郡公仍侍中文遙歷事三主明達世務每臨軒大集多令宣勅號令文武聲韻高明發吐無滯然探測上旨時有委巷之言故不為知音所重齊因魏制宰縣多用廝濫至於士流恥居百里

文遙以縣令為字民之切遂請革選於是密令搜揚貴游子弟發勅用之猶恐其披訴總召集神虎門令趙郡王叡宣旨唱名厚加慰喻士人為縣自此始也既與趙彥深和士開同被任遇雖不如彥深清正守道又不為士開貪淫亂政在於季孟之間然性和厚與物無競故時論不在彥深之下初文遙自洛遷鄴唯有地十餘頃家貧所資衣食魏之將季宗姓被侮有人冒相侵奪文遙即以與之及貴此人尚在乃將家逃竄文遙大驚追

加撫慰還以與之彼人愧而不受彼此俱讓遂為閑田  
至後主嗣位趙郡王叡婁定遠等謀出和士開文遙亦  
參其謀叡見殺文遙由是出為西兗州刺史詣士開別  
士開曰處得言地使元家兒作令僕深負朝廷既言而  
悔仍執手慰勉之猶慮文遙自疑用其子行恭為尚書  
即以慰其心士開死自東徐州刺史徵入朝竟不用卒  
行恭美姿貌有父風兼俊才位中書舍人待詔文林館  
齊亡與陽休之等十八人同入關稍遷司勳下大夫隋



開皇中位尚書郎坐事徙瓜州而卒行恭少頗自驕恣  
文遙令與范陽盧思道交游文遙嘗謂思道云小兒比  
日微有所知是大弟之力然白擲劇飲甚得師風思道  
答云六郎辭情俊邁自是克荷堂構而白擲劇飲亦天  
性所得行恭弟行如亦聰慧早成武平末位著作佐郎  
趙隱字彥深自云南陽宛人漢太傅喜之後高祖父難  
為齊州清河太守有惠政遂家焉清河後改為平原故  
為平原人也隱避齊廟諱故以字行父奉伯仕魏位中

書舍人行洛陽令彥深貴贈司空彥深幼孤貧事母甚孝年十歲曾候司徒崔光光謂賓客曰古人觀眸子以知人此人當必遠至性聰敏善書計安閑樂道不雜交游爲雅論所歸服昧爽輒自埽門外不使人見率以爲常初爲尚書令司馬子如賤客供寫書子如善其無誤欲將入觀省舍彥深靴無氈衣帽穿弊子如給之用爲書令史月餘補正令史神武在晉陽索二史子如舉彥深後拜子如開府參軍超拜水部郎及文襄爲尚書令

攝令選沙汰諸曹郎彥深以地寒被出為滄州別駕辭  
不行子如言於神武徵補大丞相功曹參軍專掌機密  
文翰多出其手稱為敏給神武曾與對坐遣造軍令以  
手捫其額曰若天假卿年必大有所至每謂司徒孫騰  
曰彥深小心恭謹曠古絕倫及神武崩祕喪事文襄慮  
河南有變仍自巡撫乃委彥深後事轉大行臺都官郎  
中臨發握手泣曰以母弟相托幸得此心既而內外寧  
靜彥深之力及還發喪深加褒美乃披郡縣簿為選封

安國縣伯從征潁川時引水灌城城雉將沒西魏將王  
思政猶欲死戰文襄令彥深單身入城告喻即日降之  
便手牽思政出城文襄大悅先是文襄謂彥深曰吾昨  
夜夢獵遇一羣豕吾射盡獲之獨一大豕不可得卿言  
當為吾取須臾獲豕而進至是文襄笑曰夢驗矣即解  
思政佩刀與彥深曰使卿常獲此利文宣嗣位仍典機  
密進爵為侯天保初累遷祕書監以為忠謹每郊廟必  
令兼太僕執御陪乘轉大司農帝或巡幸即輔贊太子

知後事為東南道行臺尚書徐州刺史為政尚恩信為  
吏民所懷多所降下所營軍處士庶追思號趙行臺頓  
文宣璽書勞勉徵為侍中仍掌機密河清元年進爵樂  
安公累遷尚書左僕射齊州大中正監國史遷尚書令  
位特進封宜陽王武平二年拜司空為祖珽所間出為  
西兗州刺史四年徵為司空轉司徒丁母憂尋起為本  
官七年六月暴疾薨時年七十彥深歷事累朝掌參機  
近溫柔謹慎喜怒不形於色自皇建已還禮遇稍重每

有引見或升御榻常呼官號而不名也凡諸選舉先令  
銓定提獎人物皆以行業為先輕薄之徒弗之齒也孝  
昭既執朝權羣臣多密勸進彥深獨不致言孝昭嘗謂  
王晞云若言衆心皆謂天下有歸何不見彥深有語晞  
以告彥深彥深不獲已陳請其為時重如此常遜言恭  
己未嘗以驕矜待物所以或出或處去而復還母傳氏  
雅有操識彥深三歲傳便孀居家人欲以改適自誓以  
死彥深五歲傳謂之曰家貧兒小何以能濟彥深泣而

言曰若天哀矜兒大當仰報傳感其意對之流涕及彥  
深拜太常卿還不脫朝服先入見母跪陳幼小孤露蒙  
訓得至於此母子相泣久之然後改服後為宜陽國太  
妃彥深有七子仲將知名沈敏有父風溫良恭儉雖見  
妻子亦未嘗怠慢終日儼然學涉羣書善草隸雖與弟  
書書字楷正云草不可不解若施之於人即似相輕忽  
若當家卑幼又恐其疑所在宜爾是以必須隸筆彥深  
乞轉萬年縣子授之位給事黃門侍郎散騎常侍隋開

皇中位吏部郎終於安州刺史齊朝宰相善始令終唯  
彦深一人然諷朝廷以子叔堅為中書侍郎頗招物議  
時馮子琮子慈明祖珽子君信並相繼居中書故時語  
云馮祖及趙穢我鳳池然叔堅身才最劣

祖珽字孝徵范陽道人也父瑩魏贈尚書左僕射司徒  
自有傳珽神情機警言詞藻逸少馳令譽為當世所推  
起家祕書郎對策高第為尚書儀曹郎中典儀注嘗為  
冀州刺史万俟受洛製清德頌其文典麗由是神武聞



之時文宣為并州刺史署珽開府倉曹參軍神武口授  
珽三十六事出而疏之一無遺失大為僚類所賞時神  
武送魏蘭陵公主出塞嫁蠕蠕魏收賦出塞及公主遠  
嫁詩二首珽皆和之大為時人傳詠珽性疎率不能廉  
謹守道倉曹雖云州局及受山東課輸由此大有受納  
豐於財產又自解彈琵琶能為新曲招城市年少歌舞  
為娛游集諸倡家與陳元康穆子容任曹元士亮等為  
聲色之游諸人嘗就珽宿出山東大文綾并連珠孔雀

羅等百餘匹令諸姬擲擣搏賭之以為戲樂參軍元景獻故尚書令元世儁子也其妻司馬慶雲女乃魏孝靜帝姑博陵長公主所生珽忽迎景獻妻赴席與諸人遞寢亦以貨物所致其豪縱淫逸如此常云丈夫一生不負身已文宣罷州珽例應隨府規為倉局之間致請於陳元康元康為白由是還任倉曹珽又委體附參軍事攝典籤陸子先為畫計請糧之際令子先宣教出倉粟十車為寮官捉送神武親問之珽自言不署歸罪子先

神武信而釋之珽出而言曰此丞相天緣明鑒然實孝  
徵所爲性不羈放縱曾至膠州刺史司馬世雲家飲酒  
遂藏銅疊二面厨人請搜諸客果於珽懷中得之見者  
以爲深恥所乘老馬常稱騶駒又與寡婦王氏姦通每  
人前相聞往復裴讓之與珽早狎於衆中嘲珽曰卿那  
得如此詭異老馬年十歲猶號騶駒姦耳順尚稱娘子  
于時諠然傳之後爲神武中外府功曹神武宴寮屬於  
坐失金巨羅寶泰令飲酒者皆脫帽於珽髻上得之神

武不能罪也後為祕書丞領舍人事文襄州客至請賣  
華林徧畧文襄多集書人一日一夜寫畢退其本曰不  
須也珽以徧畧數帙質錢携補文襄杖之四十又與令  
史李雙倉督成祖等作晉州啟請粟三千石代功曹參  
軍趙彥深宣神武教給成局參軍事過典籤高景畧疑  
其不實密以問彥深彥深答都無此事遂被推檢珽即  
引伏神武大怒決鞭二百配甲坊加鉗錮其穀倍徵未  
及科會并州定國寺成神武謂陳元康溫子昇曰昔作

芒山寺碑文時稱妙絕今定國寺碑當使誰作詞也元  
康因薦珽才學并解鮮卑語乃給筆札就禁所具草一  
日內成其文甚麗神武以其工而且速特恕不問然猶  
免官散參相府文襄嗣事以為功曹參軍及文襄遇害  
元康被傷創重倩珽作書屬家累事并云祖喜邊有少  
許物宜早索取珽乃不通此書喚祖喜私問得金二十  
五挺唯與祖喜二挺餘盡自入又盜元康家書數千卷  
祖喜懷恨遂告元康二弟叔謹季璩等叔謹以語楊愔

惜頓眉答曰恐不益亡者因此得停文宣作相珽擬補令吏十餘人皆有受納而詔取教判并盜官徧畧一部時又除珽祕書丞兼中書舍人遷鄴後其事皆發文宣即付從事中郎王士淹推檢并書與平陽公淹令錄珽付禁勿令越逸淹遣田曹參軍孫子寬往喚珽受命便爾私逃黃門高德正副留臺事謀云珽自知有犯驚竄是常但宣一命向祕書稱奉并州約束須五經三部仰丞親檢校催遣如此則珽意安夜當還宅然後掩収珽

果如德正圖遂還宅薄晚就家掩之縛珽送廷尉據犯枉法處絞刑文宣以珽伏事先世諷所司命特寬其罰遂奏免死除名天保元年復被召從駕依除免例參於晉陽珽天性聰明事無難學凡諸伎藝莫不措懷文章之外又善音律解四夷語及陰陽占候醫藥之術尤是所長帝雖嫌其數犯刑憲而愛其才伎令直中書省掌詔誥珽通密狀列中書侍郎陸元規勅令裴英推問元規以應對忤旨被配甲坊除珽尚藥丞尋遷典御又奏

造胡桃油復為割藏免官文宣每見之常呼為賊文宣  
崩普遷勞舊除為寧武太守會楊愔等誅不之官授著  
作郎數上密啟為孝昭所忿勅中書門下二省斷珽奏  
事珽善為胡桃油以塗畫為進之長廣王因言殿下有  
非常骨法孝徵夢殿下乘龍上天王謂曰若然當使兄  
大富貴及即位是為武成皇帝擢拜中書侍郎帝於後  
園使珽彈琵琶和士開胡舞各賞物百段士開忌之出  
為安德太守轉齊郡太守以母老乞還侍養詔許之會



南使入聘爲中勞使尋爲太常少卿散騎常侍假儀同  
三司掌詔誥初珽於乾明皇建之時知武成陰有大志  
遂深自結納曲相祇奉武成於天保世頻被責心常銜  
之珽至是希旨上書請追尊太祖獻武皇帝爲神武高  
祖文宣皇帝改爲威宗景烈皇帝以悅武成武成從之  
時皇后愛少子東平王儼願以爲嗣武成以後主體正  
居長難於移易珽私於士開曰君之寵幸振古無二宮  
車一日晚駕欲何以克終士開因求策焉珽曰宜說主

上云文襄文宣孝昭三帝子俱不得立今宜命皇太子  
早踐大位以定君臣若事成中宮少主皆德君此萬全  
計也君且微說令主上粗解珽當自外表論之士開許  
諾因有彗星出太史奏云除舊布新之徵珽於是上書  
言陛下雖爲天子未是極貴案春秋元命苞云乙酉之  
歲除舊革政今年太歲乙酉宜傳立東宮令君臣之分  
早定且以上應天道并上魏獻文禪子故事帝從之由  
是拜祕書監加儀同三司大被親寵既見重二宮遂志

於宰相先與黃門侍郎劉逖友善乃疏侍中尚書令趙彥深侍中左僕射元文遙侍中和士開罪狀令逖奏之逖懼不敢通其事頗泄彥深等先詣帝自陳帝大怒執珽詰曰何故毀我士開珽因厲聲曰臣由士開得進本無心毀之陛下今既問臣臣不敢不以實對士開文遙彥深等專弄威權控制朝廷與吏部尚書尉瑾內外交通共為表裏賣官鬻獄政以賄成天下歌謠若為有識所知安可聞於四裔陛下不以為意臣恐大齊之業墮

矣帝曰爾乃誹謗我珽曰不敢誹謗陛下取人女帝曰  
我以其儉餓故收養之珽曰何不開倉賑給乃買取將  
入後宮乎帝益怒以刀鐐築口鞭杖亂下將撲殺之大  
呼曰不殺臣陛下得名殺臣臣得名若欲得名莫殺臣  
臣為陛下合金丹遂少獲寬放珽又曰陛下有一范增  
不用知可如何帝又怒曰爾自作范增以我為項羽邪  
珽曰項羽人身亦何由可及但天命不至耳項羽布衣  
率烏合之衆五年而成霸業陛下藉父兄資財得至此

臣以為項羽未易可輕臣何止方於范增縱擬張良亦不能及張良身傳太子猶因四皓方定漢嗣臣位非輔弼疎外之人竭力盡忠勸陛下禪位使陛下尊為太子居宸扆於已及子俱保休祚最爾張良何足可數帝愈怒令以土塞其口琰且吐且言無所屈撓乃鞭二百配甲坊尋徙於光州刺史李祖勲遇之甚厚別駕張奉禮希大臣意上言琰雖為流囚常與刺史對坐勅報曰牢掌奉禮曰牢者地牢也乃為深阬置諸內苦加防禁

桎梏不離其身家人親戚不得臨視夜中以蕪菁子燭薰眼因此失明武成崩後主憶之就除海州刺史是時陸令萱外干朝政其子穆提婆愛幸珽乃遺陸媼弟悉達書曰趙彥深心腹陰沉欲行伊霍事儀同弟弟豈得平安何不早用智士邪和士開亦以珽能決大事欲以爲謀主故棄除舊怨虛心待之與陸媼言於帝曰文襄文宣孝昭三帝其子皆不得立今至尊獨在帝位者實由祖孝徵又有大功宜重報之孝徵心行雖薄奇畧出

人緩急真可馮仗且其雙盲必無反意請喚取問其謀  
計帝從之入爲銀青光祿大夫祕書監加開府儀同三  
司和士開死後仍說陸媼出彥深以珽為侍中在晉陽  
通密啟請誅琅邪王其計既行漸被任遇又靈太后之  
被幽也珽欲以陸媼為太后撰魏帝皇太后故事為太  
姬言之謂人曰太姬雖云婦人實是雄傑女媧以來無  
有也太姬亦稱珽為國師國寶由是拜尚書左僕射監  
國史加特進入文林館總監撰書封燕郡公食太原郡

幹給兵七十人所住宅在義井坊旁拓隣居大事修築  
陸媼自往案行勢傾朝野斛律光甚惡之遙見竊罵云  
多事乞索小人欲作何計數嘗謂諸將云邊境消息處  
分兵馬趙令嘗與吾等參論之盲人掌機密來全不共  
我輩語止恐誤國家事又珽頗聞其言因其女皇后無  
寵以謠言聞上曰百升飛上天明月照長安令其妻兄  
鄭道蓋奏之帝問珽珽證實又說謠云高山崩榭樹舉  
盲老公背上下大斧多事老母不得語珽并云盲老公



是臣自云與國同憂戚勸上行語其多事老母似道女  
侍中陸氏帝以問韓長鸞穆提婆并令高元海段士良  
密議之衆人未從因光府參軍封士讓啟告光反遂滅  
其族珽又附陸媼求爲領軍後主許之詔須覆述取侍  
中斛律孝卿署名孝卿密告高元海元海語侯呂芬穆  
提婆云孝徵漢兒兩眼又不見物豈合作領軍也明旦  
面奏具陳珽不合之狀并書珽與廣寧王孝珩交結無  
大臣體珽亦求面見帝令引入珽自分疎并云與元海

素嫌必是元海譖臣帝弱顏不能諱曰然珽列元海與  
司農卿尹子華太府少卿李叔元平準令張叔畧等結  
朋樹黨遂除子華仁州刺史叔元襄城郡守叔畧南營  
州錄事參軍陸媪又唱和之復除元海鄭州刺史珽自  
是專主機衡總知騎兵外兵事內外親戚皆得顯位後  
主亦令中要數人扶侍出入著紗帽直至永巷出萬春  
門向聖壽堂每同御榻論決政事委任之重羣臣莫比  
自和士開執事以來政事隳壞珽推崇高望官人稱職

內外稱美復欲增損政務沙汰人物奏罷京畿府併於  
領軍事連百姓皆歸郡縣宿衛都督等號位從舊官名  
文武服章並依故事又欲黜諸閹豎及羣小輩推誠延  
士爲致安之方陸媼穆提婆議頗同異珽乃諷御史中  
丞麗伯律令劾主書王子冲納賂知其事連提婆欲使  
賊罪相及望因此坐并及陸媼猶恐後主溺於近習欲  
因后黨爲援請以皇后兄胡君瑜爲侍中中領軍又徵  
君瑜兄梁州刺史君璧欲以爲御史中丞陸媼聞而懷

怒百方排毀即出君瑜為金紫光祿大夫解中領軍君璧還鎮梁州皇后之廢頗亦由此王子沖釋而不問珽日以益疏又諸宦者更共譖毀之無所不至後主問諸太姬憫嘿不對三問乃下牀拜曰老婢合死本見和士開道孝徵多才博學言為善人故舉之比來看之極是罪過人實難容老婢合死後主令韓鳳檢案得其詐出勅受賜十餘事以前與其重誓不殺遂解珽侍中僕射出為北徐州刺史珽求見分疎韓長鸞積嫌於珽遣人

推出栢閣珽固求面見坐不肯行長鸞乃令軍士牽曳而出立珽於朝堂大加誚責上道後復令追還解其開府儀同三司直為刺史至州會有陳寇百姓多反珽不閉城門守陴者皆令下城靜坐街巷禁絕人行鷄犬不聽鳴吠賊無所聞見莫測所以或疑人走城空不設警備至夜珽忽令大叫鼓躁誼天賊衆大驚登時走散後復率衆向城珽乘馬自出令錄事參軍王君植率軍馬仍親臨戰陣賊先聞其言謂為不能拒抗忽見親在戎

行彎弧縱鏑相與驚恠畏之而罷時提婆憾之不已欲令城陷沒賊雖知危急不遣救援珽且守且戰十餘日賊竟奔走珽卒保全卒於州子君信涉獵書史多諸雜藝位兼通直散騎常侍聘陳使副中書郎珽出亦見廢免君信弟君彥容貌短小言辭澁訥少有才學隋大業中位至東平郡書佐郡陷翟讓因為李密所得密甚禮之署為記室軍書羽檄皆成其手及密敗為王世充所殺珽弟孝隱亦有文學早知名詞章雖不逮兄機警有

口辯兼解音律魏末爲兼散騎常侍迎梁使時徐君房  
庾信來聘名譽甚高魏朝聞而重之接對者多取一時  
之秀盧元景之徒並降階攝職更遞司賓孝隱少處其  
中物議稱美孝隱從父弟茂頗有辭情然好酒性率不  
爲時所重太寧中以經學爲本鄉所薦除給事中以疾  
辭仍不復任珽受任寄故令呼茂茂不獲已暫來就之  
珽欲奏爲官茂引逃去珽族弟崇儒涉學有辭章少以  
局幹知名武平末位司州別駕通直常侍入周爲宕昌

郡太守隋開皇初終宕州長史

赫連子悅字士欣赫連勃勃之後也神武起兵時為濟州別駕勸刺史侯景赴神武後除林慮太守文襄往晉陽由郡境問所不便子悅云臨水武安去郡遙遠山嶺重疊若東屬魏郡則地平路近文襄笑曰卿徒知使人不覺損幹子悅曰所言者人所疾苦不敢以私潤負公心文襄善之乃勅依事施行自是人屬近便行路稱之天保中為揚州刺史先是城門早閉晚開廢於農作子



悅到乃命以時開閉人吏使之累遷鄭州刺史政為天下之最入為都官尚書鄭州人馬子韶崔孝武等八百餘人請立碑頌德有詔許焉加位開府歷行北豫州事兼吏部尚書子悅在官唯以清勤自守既無學術又闕風儀人倫清鑒去之彌遠一旦居銓衡之首大招物議由是除太常卿兼侍中聘周使主卒子仲章中書舍人馮子琮字子琮長樂信都人北燕主馮弘之後也祖嗣興相州刺史父靈紹度支郎太中大夫子琮貴贈開府

儀同三司子琮性識聰敏爲外祖滎陽鄭伯猷所異初襲爵滎陽縣子天保初改爲長安縣男皇建初爲尚書駕部郎中攝庫部孝昭曾閱簿領試令口陳子琮闇對無有遺失時梁丞相王琳歸國孝昭詔子琮觀其形貌琳即與赴鄴甚見嘉賞子琮妻胡皇后姊也故詔與胡長絜輔導太子後轉太子中庶子天統元年武成禪位後主謂子琮曰少君左右宜得正人以卿心存正直今以後事相委再遷散騎常侍奏門下事尋兼并省祠部

尚書後與胡長粲有隙武成深誠之曰唇亡齒寒勿復  
如此武成在晉陽既居舊殿少帝未有別所詔子琮監  
造大明宮宮成武成親自巡幸恠其不甚宏麗子琮對  
曰至尊幼年纂承大業欲令敦行節儉以示萬邦兼此  
北連天闕不宜過復崇峻武成稱善又詔子琮監議五  
禮與趙郡王叡分爭異同畧無降下大為識者所鄙及  
武成崩和士開祕喪三日子琮問其故士開引神武文  
襄初崩並祕不舉喪至尊年少恐王公懷貳欲追集然

後詳議時趙郡王叡先預帷幄之謀子琮素知士開忌  
叡及領軍婁定遠恐其矯遺詔出叡外任奪定遠禁衛  
權因答云大行神武之子今上又是先皇禪位羣臣富  
貴皆至尊父子之恩但令一無改易必無異望世異事  
殊不得與霸朝相比且公不出宮門已經數日升遐之  
事行路皆傳久而不舉恐有他變及發喪元文遙以子  
琮太后妹夫恐其獎成太后干政說趙王叡及和士開  
出之拜鄭州刺史既非後主本意賞賜甚厚仍轉滄州

別駕封寧都縣伯未幾太后爲齊安王納子琮長女爲  
妃子琮因請假赴鄴遂授侍中轉吏部尚書其妻恃親  
放縱請謁公行賄貨填委守宰除授先定錢帛多少然  
後奏聞其所通致事無不允子琮亦不禁制又廣拓傍  
鄰增修宅宇以夜繼晝未曾休息斛律光將兵度玉壁  
至龍門周有移書別須籌議詔子琮乘傳至軍與周將  
韋孝寬面相要結龍門等五城因此內附後主以爲子  
琮之功封昌黎郡公遷尚書右僕射仍攝選侍中如故

和士開居要日久子琮舊所附託中雖阻異其後還相  
彌縫士開弟士休與盧氏成婚子琮檢校趨走與士開  
府僚不異是時內外官除授多由士開奏擬子琮既恃  
內戚兼帶選曹自擅權寵頗生間隙時陸媼執震天下  
太后與之結為姊妹而和士開與太后有醜聲子琮欲  
陰殺陸媼及士開因廢帝而立琅邪王儼以謀告儼儼  
許之乃矯詔殺士開及儼見執言子琮教已太后怒又  
使執子琮遣右衛大將軍侯呂芬就內省以弓弦絞殺

之使內參以庫車載尸歸其家諸子方握槩聞庫車來  
以為賜物大喜開視入哭子琮微有識鑒頗慕公正及  
位望轉隆宿心頓改擢引非類以為深交縱其子弟官  
位不依論次又專營婚媾歷選上門例以官爵許之旬  
月便驗頓邱李克范陽盧思道隴西李允伯李子希榮  
陽鄭庭堅並其女婿皆至超遷其驕縱如此祖珽先與  
子琮有隙於後具奏此事諸子並坐除名太后以為言  
又被擢用子琮有五子慈明最知名隋大業末死節列

在忠義傳中

辛術字懷哲隴西狄道人也父琛魏南梁太守自有傳  
術少明敏有識度解褐司空曹參軍與僕射高隆之  
共典營構鄴都宮室術有思理百工剋濟再遷尚書右  
丞出爲清河太守政有能名追授并州刺史遭父憂去  
職清河父老數百人詣闕上書請立碑頌德文襄嗣事  
與尚書左丞宋游道中書侍郎李繪等並追詣晉陽俱  
爲上客累遷散騎常侍魏武定六年侯景叛除東南道



行臺尚書封江夏縣男與高岳等破侯景禽蕭淵明遷  
東徐州刺史爲淮南經畧使天保元年侯景徵江西租  
稅術率諸軍度淮斷之燒其稻數百萬石還鎮下邳人  
隨術北度淮者三千餘家東徐州刺史郭志殺郡守文  
宣聞之勅術自今所統十餘州地諸有犯法者刺史先  
啟聽報以下先斷後表聞齊代行臺兼總民事自術始  
也安州刺史臨清太守盱眙台蘄城二鎮將犯法術皆案  
奏殺之睢州刺史及所部郡守俱犯大辟朝廷以其奴

婢百口及貲財盡賜術三辭不見許術乃送詣所司不復以聞邢邵聞之遺術書曰昔鍾離意云孔子忍渴於盜泉便以珠璣委地足下今能如此可謂異代一時及王僧辯破侯景術招攜安撫城鎮相繼款附前後二十餘州於是移鎮廣陵獲傳國璽送鄴文宣以璽告於太廟此璽即秦所制方四寸上紐交盤龍其文曰受命於天既壽永昌二漢相傳又歷魏晉晉懷帝敗沒於劉聰聰敗沒於石氏石氏敗晉穆帝永和中濮陽太守戴僧

施得之遣督護何融送于建鄴歷宋齊梁梁敗侯景得之景敗侍中趙思賢以璽投景南兖州刺史郭元建送于術故術以進焉尋徵為殿中尚書領太常卿仍與朝賢議定律令遷吏部尚書食南兖州梁郡幹遷鄴以後大選之職知名者數四互有得失未能盡美文襄少年高朗所蔽者疎袁叔德沈密謹厚所傷者細楊惛風流辯給取士失於浮華唯術性尚貞明取士必以才器循名責實新舊參舉管庫必擢門下不遺考之前後銓衡

在術最爲折衷甚爲當時所稱舉天保末文宣嘗令術選百員官參選者二三千人術題目士子人無謗議其所旌擢後亦皆致通顯術清儉寡嗜慾勤於所職未嘗暫懈臨軍以威嚴收人有惠政少愛文史晚更勤學雖在戎旅手不釋卷及定淮南凡諸貨物一毫無犯唯大收典籍多是宋齊梁氏佳本鳩集萬餘卷并顧陸之徒名畫二王已下法書數亦不少俱不上王府唯入私門及還朝頗以饒遺貴要物議以此少之十年卒年六十

皇建二年贈開府議同三司中書監青州刺史子閣卿  
尚書郎閣卿弟衡卿有識學開府參軍事隋大業初卒  
於太常丞

裴讓之字士禮河東聞喜人也父佗仕魏歷趙郡太守  
荊州刺史有惠政列在循吏傳中讓之年十六喪父殆  
不勝哀其母辛氏泣撫之曰棄親滅性得為孝子乎由  
是自勉辛氏高明婦人又閑禮度夫喪諸子多幼弱廣  
延師友或親自教授內外親屬有吉凶禮制多取則焉

讓之少好學有文情清明俊辯早得聲譽魏天平中舉秀才對策高第累遷屯田主客郎中省中語曰能賦詩裴讓之為太原公開府記室與楊愔友善相遇則清談彌日愔每云此人風流警拔裴趙郡為不亡矣梁使至嘗令讓之攝主客郎酬應閑雅為時所稱頃之弟諏之奔關右讓之兄弟皆拘繫齊神武問云諏之何在答曰昔吳蜀二國諸葛兄弟各盡心所事况讓之老母在此君臣分定失忠與孝愚夫不為伏願明公以誠信待物

若以不信處物物亦安能自信以此定霸猶却行而求道耳神武善其言兄弟俱釋歷文襄大將軍主簿兼中書舍人後兼散騎常侍聘梁文襄嘗入朝讓之導引容儀醞藉文襄目之曰士禮佳舍人也遷長兼中書侍郎領舍人齊受禪靜帝遜居別宮與諸臣別讓之流涕歛歛以參掌儀注封寧都縣男帝欲以為黃門侍郎或言其體重不堪趨侍乃除清河太守至郡未幾楊愔謂讓之諸弟曰我與賢兄交歛企聞善政適有人從清河來

云姦吏斂迹盜賊清靜朞月之期翻更非速清河有二  
豪吏田轉貴孫舍興久吏姦猾多有侵削因事遂脅人  
取財計賊依律不至死讓之以其亂法殺之時清河王  
岳為司州牧遣部從事按之侍中高德政舊與讓之不  
協奏言當陛下受禪之時讓之眷戀魏朝嗚咽流涕比  
為內官情非所願既而楊愔請救之云罪不應死文宣  
大怒謂愔曰欲得與裴讓之同冢邪於是朝臣無復敢  
言者事奏竟賜死於家諷之字士正少好儒學釋褐太



學博士嘗從常景借書百卷十許日便還景疑其不能  
讀每卷策問應答無遺景歎曰應奉五行俱下彌衡一  
覽便記今復見之於裴生矣楊惛合門改葬託諏之頓  
作十餘墓誌文皆可觀讓之諏之及皇甫和和弟亮並  
知名於洛下時人語曰諏勝於讓和不如亮司空高乾  
致書欲相屈為戶曹參軍諏之復書不受署沛王開大  
司馬府辟為記室遷鄴後諏之留在河南西魏領軍獨  
孤信入據金墉以諏之為開府屬號曰洛陽遺彥信敗

諷之居南山洛陽刺史王元軌召爲中從事西師忽至  
尋退遂隨西師入關周文以爲大行臺倉曹郎中卒贈  
徐州刺史諷之弟猷之字士平七歲便勤學早知名累  
遷司徒主簿楊愔每稱歎曰河東士族京官不少唯此  
兄弟全無鄉音猷之雖年少不妄交游唯與隴西辛術  
趙郡李繪頓邱李構清河崔瞻爲忘年友孝昭梓宮將  
還鄴轉儀曹郎尤悉歷代故事儀注喪禮皆能裁正爲  
許昌太守賓客過郡出私財供給無賦於民去日爲百

性所懷齊亡仕周卒伊川太守讞之弟謀之字士令少  
有風格邢邵每云我裴四武成為開府辟為參軍掌書  
記謀之弟訥之字士言純謹有局量弱冠為平原公開  
府墨曹掌書記從至并州其母在鄴忽得心痛訥之是  
日不勝思慕心亦驚痛乃請急而還當時以為孝感文  
宣踐阼幸晉陽皇太子監國留訥之與杜臺卿並為齋  
帥領東宮管記轉太子舍人奏中書舍人事衛尉杜弼  
被其家客誣云有怨言謗訥時政并稱訥之與弼交好

頗知之坐免官卒天統中追贈平州刺史長子樊出後讓之次子矩最知名隋史有傳訥之弟謁之字士敬少有志節好直言文宣末年昏縱朝臣罕有言者謁之上書正諫言甚切直文宣將殺之白刃臨頸謁之辭色不變帝曰癡漢何敢爾楊愔曰此子望陛下殺之以取後世名帝投刃曰小子望我殺爾以取名我終不成爾名也遣人送出齊亡卒於壺關今皇甫和者字長諧安定朝那人其先因官寓居漢中祖澄南齊梁二州刺史父

徽字子元梁安定畧陽二郡守魏正始二年隨其妻父  
夏侯道遷入魏道遷別上勲書欲以徽爲元謀徽曰創  
謀之始本不關預雖貪榮賞內愧於心遂拒不許梁州  
刺史羊靈祐重其敦實表爲征虜府司馬卒和年十一  
而孤母夏侯氏才明有禮則親授以經書及長沈靜有  
雅量尤明禮儀宗親吉凶多相諮訪卒於濟陰太守子  
聿道以幹局知名位廣平令隋大業初比部郎和弟亮  
字君翼九歲喪父哀毀有若成人神武起義爲大行臺

郎中亮率性任真不樂劇職除司徒東閣祭酒思還鄉里啟乞梁州褒中即本郡也後降梁以母兄在北求還梁武不奪也至鄴無復宦情遂入白鹿山恣泉石之賞縱酒賦詩超然自樂復爲尚書殿中郎攝儀曹事以參撰禪代儀注封榆中男亮疎慢自任無幹務才每有禮儀大事常令餘司攝焉性質樸純厚終無片言矯飾屬有勅下司各列勤惰亮三日不上省文宣親詰其故亮曰一日雨一日醉一日病酒文宣以其恕實優容之杖

脛三十而已所居宅洿下標榜賣之將買者或問其故  
亮每答云爲宅中水淹不洩雨即流入牀下由此宅終  
不售其淳實如此以兼散騎常侍聘陳使主以不稱免  
官後除任城太守病不之官卒於鄴贈驃騎大將軍安  
州刺史

崔劼字彥元清河人魏贈太傅尚書令光之子也光自  
有傳劼清虛寡欲好學有家風魏末累遷中書侍郎興  
和三年兼通直散騎常侍使梁天保初以議禪代除給

事黃門侍郎加國子祭酒直內省典機密清儉勤慎甚  
爲文宣帝所知拜南青州刺史有政績入爲祕書監齊  
州大中正遷并省度支尚書俄授京省尋轉五兵尚書  
監國史臺閣之中見稱簡正武成之將禪後主先以問  
劾劾諫以爲不可由是忤意出爲南充州刺史代還重  
爲度支尚書儀同三司文登縣幹尋除中書令加開府  
待詔文林館監修撰新書卒贈齊州刺史尚書左僕射  
諡文貞初和士開擅朝曲求物譽諸公頗因此爲子弟



干祿世門之胄多處京官而劾二子拱搆並為外任弟  
廓之從容謂劾曰拱幸得不凡何不在省府中清華之  
所而並出外藩劾曰立身來恥以言自達今若進兒與  
身何異卒無所求聞者莫不歎服劾常恨魏收書欲更  
作編年紀而才思竟不能就云

崔肇師清河東武城人也祖亮魏贈車騎大將軍儀同  
三司父士泰龍驤將軍征南別將肇師少時疎放長輒  
變節更成謹厚涉獵經史頗有文思天平初以通直散

騎侍郎為慰勞青州使至齊州界為土賊崔迦葉等拘  
欲逼與同事肇師執志不動喻以禍福賊遂捨之仍巡  
慰青部而還肇師以從弟乾亨同居事伯母甚謹文襄  
嘗言肇師合誅左右問其故曰崔鴻十六國春秋述諸  
僭偽而不及江東左右曰肇師與鴻別族乃止天保初  
以參定禪代禮儀封襄城縣男仍兼中書侍郎卒始鄴  
下有薛生者能相人言趙彥深當大貴肇師因問已答  
曰公門望甚高爵位不及趙終如其言

盧潛范陽涿人也祖尚之魏司徒左長史前將軍濟州刺史光祿大夫父文符通直散騎侍郎潛容貌瓌偉善言談少有成人志尚累遷大將軍府中兵參軍機事疆濟為文襄所知言其終可大用王思政見獲於潁州文襄重其才識潛常從容白文襄思政不能死節何足可重文襄謂左右曰我有盧潛便是更得一王思政天保中除左戶郎中坐譏議魏書與王松年李庶等俱被禁止會清河王岳救江陵特赦潛為岳行臺郎還歷中書

中書黃門侍郎爲奴誣告謀反文宣明之以奴付潛潛不之責黃門鄭子默奏潛從清河王岳南討岳令潛說梁將侯瑱大納瑱賂遺還不奏聞文宣杖潛一百乃截其鬚潛顏色不變歷魏尹丞司州別駕江州刺史所在有善政孝昭作相以潛爲揚州道行臺左丞先是梁將王琳擁其主蕭莊歸壽陽朝廷以琳爲揚州刺史勅潛與琳爲南討經畧後除行臺尚書儀同三司王琳銳意圖南潛以爲時事未可由是與琳有隙更相表列武成

追琳入鄴除潛揚州刺史領行臺尚書潛在淮南十三年大樹風績為陳人所憚陳主與其邊將書云盧潛猶在卿宜深備之文宣初平淮南給復十年年滿後逮天統武平中徵稅頗雜又高元海執政斷漁獵人家無以自資諸商胡負官責息者宦者陳德信縱其妄注淮南富家令州縣徵責又勅送突厥馬數千匹於揚州管內令土豪貴買之錢直始入便出勅括江淮間馬並送官廐由是百姓騷擾切齒嗟怨潛隨事撫慰兼行權畧故

得寧靖武平三年徵爲五兵尚書揚州吏民以潛斷酒肉篤信釋氏大設僧會以香花緣道流涕送之潛歎曰正恐不久復來耳至鄴未幾復爲揚州道行臺尚書四年陳將吳明徹來寇領軍封輔相赴援陳兵及峴輔相不從潛固爭不得憂憤發病卧幕下果敗陳人遂圍壽陽壅芍陂以水灌之詔王長春爲南討都督長春軍次河南多給兵士糧便鳴角欲引而賤糴其米及頓兵更貴糴其米乃與皮景和擁衆十萬於淮北不進壽陽城

中青黑龍升天城尋陷潛及行臺僕射王貴顯特進巴陵王王琳扶風王可朱渾孝裕武衛將軍奚永樂儀同索景和仁州刺史酈伯偉霍州刺史封子繡泰州刺史高子植行臺左丞李駒駘等督將五十八軍士一萬皆沒烏陳人殺王琳餘人皆囚於東冶陳主欲知齊之虛實乃出潛潛曰囚本屬幽州於河北最小口有五十萬落陳者唯與酈伯偉二人耳時李駒駘將逃歸并要潛潛曰我此頭面何可誑人吾少時相者云沒在吳越地

死生已定弟其行也因寄書於弟士邃曰吾夢汝以某月某日得患某月某日漸損皆如其言既而歎曰壽陽沒吾欲以頸血濺城而死佛教不聽自殺故往苒偷生今可死矣於是閉氣而絕其家購屍歸葬贈開府儀同三司尚書左僕射兗州刺史無子以弟士邃子元孝嗣潛雅性貞固祖珽嘗要潛陷仁州刺史劉逖許以高位潛曰如此事吾不爲也行臺慕容恃德嘗所推重有疾謂其子曰盧尚書教我為人有如昆弟我死持上驛馬



與之其子以他馬往恃德柅出門自停不可動巫祝以爲恃德聲怒曰何不與盧尚書我所騎驛馬其子遽奉命柅乃行潛以馬價爲營福事其爲時重如此士邃字子淹少爲崔昂所知昂云此昆季足爲後生之俊但恨其俱不讀書耳位尚書左右丞吏部郎中中山太守帶定州長史齊亡後卒

盧詢祖范陽涿人也祖文偉魏青州刺史父恭道范陽太守詢祖襲祖爵大夏男有術學文辭華美爲後生之

俊舉秀才至鄴趙郡李祖勳嘗宴諸文士文宣使小黃  
門勅祖勳曰蠕蠕既破何無賀表使者待之諸賓皆爲  
表詢祖勳頃便成其辭云昔十萬橫行樊將軍請而受  
屈五千深入李都尉降而不歸時重其工後朝廷大遷  
除同日催拜詢祖立於東止車門外爲二十餘人作表  
文不加點辭理可觀詢祖初襲爵有宿德朝士曰大夏  
初成詢應聲曰且得驚雀相賀天保末爲築長城子使  
自負其才內懷鬱快遂毀容服如賤役者以見楊愔愔

曰故舊皆有所縻唯大夏未加處分詢祖厲聲曰是誰之咎既至役所作築長城賦以寄其意其略曰板則紫栢杵則木瓜何斯材而斯用也草則離離靡靡緣岡而植但使十步而有一芳余亦何辭間於荊棘邢邵嘗謂曰卿小年才學富盛戴角者無上齒恐卿不壽對曰詢祖初聞此言實懷惕懼見丈人蒼蒼在鬢差以自安邵甚重其敏贍既有口辯好臧否人物衆共嫉之言其淫於從妹宗人思道謂曰大夏何為招四海議詢祖曰骨

肉還相殘何況執玉帛者萬國詢祖與思道俱為北州人俊魏收揚譽思道而以詢祖為不及詢祖謂人曰見未能高飛者借其羽毛知逸勢冲天者翦其翅翮既諸謗毀日至素論皆薄其人長廣太守邢子廣曰詢祖有規檢禰衡思道無冰稜文舉後頗折節歷太子舍人司徒記室卒有文集十卷皆遺逸

崔子樞博陵安平人魏驃騎大將軍康曾孫也父長瑜位開府中兵參軍子樞學涉好文詞彊辯有才幹齊時

爲考功郎中參議五禮待詔文林館兼散騎常侍聘周  
使還除通直散騎常侍兼知度支子樞明解世務所居  
稱職因度支有受納風聞爲御史所劾遇赦免齊亡入  
周位至上士以預尉遲迴事被誅子樞次弟子端亦有  
才幹而文藝爲優歷殿中侍御史卒於通直散騎侍郎  
子端弟子博武平末爲河陽道行臺郎隋開皇末卒於  
泗州刺史子博弟子發有文才武平末祕書郎修起居  
注仕隋爲秦王文學卒於國子博士子樞叔父叔瓚頗

有學識性好直言其妻即昭信皇后姊也文宣擢為魏  
尹丞屬蝗蟲為灾帝以問叔瓚對曰案漢書五行志土  
功不時蝗蟲作厲當今外築長城內興三臺故致此灾  
帝大怒命左右歐之又擢其髮以溷汁沃其頭曳以出  
由是廢頓之後卒於平陽太守贈本州刺史

通志卷一百五十四